



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-4/02

Sarajevo, 16. januara 2002.

Z A P I S N I K

sa 19. sjednice Predstavničkog doma Parlamentarne skupštine Bosne i Hercegovine,
održane 16. januara 2002. godine

Devetnaesta sjednica počela je sa radom u 12,30 sati. Prisustvovalo je 40 poslanika. Odsustvo je opravdao poslanik Mirko Baković.

Pored poslanika sjednici su prisustvovali: Beriz Belkić, član Predsjedništva BiH, Zlatko Lagumdžija, predsjedavajući Vijeća ministara BiH, ministar Svetožar Mihajlović, zamjenici ministara Muharem Imamović, Gordana Ković, Jusuf Halilagić, Nikola Kragulj, Rasim Kadić, Milan Lovrić i Milovan Blagojević.

Iz međunarodnih organizacija sjednici su prisustvovali: Jan Petter Holtedahl – OHR, Stefan Limosas, politički savjetnik u Evropskoj komisiji, Sandy Blyth, EUMM, Dauglas Jonis – ispred Američke ambasade.

Kako je ovo bila prva sjednica u 2002. godini, predsjedavajući Željko Mirjanić još jedanput je svim građanima BiH, kao i poslanicima i ostalim prisutnim na sjednici poželio srećnu i uspješnu Novu 2002. godinu. Potom je napomenuo da su poslanici na klupe dobili nešto izmijenjeni prijedlog dnevnog reda koji je usaglašen na sjednici Kolegija u proširenom sastavu održanoj neposredno pred početak sjednice Doma. Predsjedavajući je obavijestio poslanike da je Prošireni kolegij zaključio da se u srijedu 23. januara 2002. godine održi sjednica Proširenog kolegija na kojoj će se razmatrati rad i uslovi rada Predstavničkog doma, kao i putovanja članova Kolegija i poslanika u okviru međunarodnih posjeta.

U diskusiji su povodom prijedloga dnevnog reda učestvovali: Adem Borić, Franjo Majdandžić, Abdurahman Malkić i Mariofil Ljubić.

Adem Borić je iznio stav Kluba poslanika SDA da taj klub insistira da se u dnevni red sjednice Doma uvrsti, kao posebna tačka – putovanja u inostranstvo Kolegija i poslanika – jer je praksa da 4-5 ljudi stalno putuju i o tome odluku donosi Kolegij, a da se pri tome i ne konsultuje Komisija za vanjske poslove, rekao je, pored ostalog, Adem Borić.

Franjo Majdančić je predložio da se u dnevni red uvrsti razmatranje prijedloga za poboljšanje efikasnosti i sadržaja rada Predstavničkog doma, sa prijedlozima za plan rada za 2002. godinu.

Mariofil Ljubić je osporio prijedlog da se na ovoj sjednici raspravlja o planu rada, rekavši, pored ostalog, da se do naredne sjednice Proširenog kolegija 23.01. treba pripremiti šta je realizovano iz Plana za 2001. godinu i dati jedan inicijalni prijedlog plana za 2002. godinu.

Predsjedavajući Mirjanić je odgovorio da će se pitanje koje je predložio predsjedavajući Kluba SDA Adem Borić razmatrati na najavljennoj sjednici Proširenog kolegija, a što se tiče prijedloga poslanika Majdandžića, odgovorio je da su na prethodnoj sjednici Kolegija

pokrenute aktivnosti na izradi plana rada Doma za 2002. godinu, u skladu s članom 45. Poslovnika.

Adem Borić je insistirao da prva naredna sjednica Doma razmatra pitanje putovanja, jer ako se o tome raspravlja nakon dva mjeseca nastaviće se dosadašnja praksa i trošenje novca, te od te rasprave neće biti efekta.

Predsjedavajući je odgovorio da je za uvrštavanje u dnevni red potrebno pripremiti određeni materijal, pa će se to pitanje razmatrati na Proširenom kolegiju 23. januara, što je od strane predlagača prihvaćeno.

Potom je predsjedavajući konstatovao da 19. sjednica Predstavničkog doma ima sljedeći

D N E V N I R E D :

1. Usvajanje zapisnika sa 17. i 18. sjednice Predstavničkog doma,
2. Poslanička pitanja i odgovori,
3. Izvještaj zajedničke komisije o postizanju Sporazuma o jedinstvenom tekstu Zakona o industrijskom vlasništvu u Bosni i Hercegovini,
4. Izvještaj Komisije za ljudska prava, imigraciju, izbjeglice i azil o usaglašavanju prijedloga zaključaka u Izvještaju o posjetama jednom broju opština,
5. Prijedlog zakona o Pravobranilaštvu Bosne i Hercegovine (drugo čitanje),
6. Prijedlog zakona o slobodnim zonama u Bosni i Hercegovini (drugo čitanje),
7. Prijedlog zakona o državnoj službi u institucijama Bosne i Hercegovine (prvo čitanje),
8. Prijedlog zakona o autorskom pravu i srodnim pravima u Bosni i Hercegovini (prvo čitanje),
9. Prijedlog zakona o zaštiti potrošača u Bosni i Hercegovini (prvo čitanje),
10. Prijedlog zakona o upravnim sporovima Bosne i Hercegovine (prvo čitanje),
11. Davanje saglasnosti za ratifikaciju:
 - a) Sporazuma između Bosne i Hercegovine i Republike Austrije o unapređenju i zaštiti investicija,
 - b) Sporazuma između Bosne i Hercegovine i Vlade Republike Italije o podsticaju i zaštiti investicija,
 - c) Ugovora između Bosne i Hercegovine i Republike Hrvatske o saradnji i međusobnoj pomoći u carinskim pitanjima,
 - d) Sporazuma između Bosne i Hercegovine i Republike Slovenije o recipročnom unapređenju i zaštiti investicija,
 - e) Rimskog statuta Međunarodnog krivičnog suda,
 - f) Konvencije Ujedinjenih naroda protiv transnacionalnog organizovanog kriminala,
 - g) Protokola protiv krijumčarenja migranata kopnenim, morskim i vazdušnim putem, kojim se dopunjuje Konvencija Ujedinjenih naroda protiv transnacionalnog organizovanog kriminala,
 - h) Protokola za sprečavanje, zaustavljanje i kažnjavanje trgovine ljudima, naročito ženama i djecom, kojim se dopunjuje Konvencija Ujedinjenih naroda, protiv transnacionalnog organizovanog kriminala,
 - i) Sporazuma između Vijeća ministara Bosne i Hercegovine i Švajcarskog Federalnog Vijeća o međunarodnom drumskom prevozu putnika i roba,

- j) Sporazuma između Vijeća ministara Bosne i Hercegovine i Vlade Republike Mađarske o ukidanju viza za nosioce diplomatskih i službenih isprava,
- k) Sporazuma između države Kuvajt i Bosne i Hercegovine o potpisivanju i recipročnoj zaštiti investicija,
- l) Ugovora o slobodnoj trgovini između Bosne i Hercegovine i Republike Slovenije.

Ad. - 1: Usvajanje zapisnika s 17. i 18. sjednice Predstavničkog doma

Željko Bilbija zatražio je da se na 7. strani Zapisnika sa 17. sjednice, gdje se parafrizira njegova diskusija u vezi međunarodnih sporazuma, doda i njegov zahtjev – da se dostavi informacija i pod kojim kriterijima se zaključuju sporazumi.

Uz prethodnu diskusiju, glasajući ponaosob o oba zapisnika, Dom je jednoglasno usvojio zapisnike sa 17. i 18. sjednice Predstavničkog doma, sa primjedbom poslanika Bilbije.

Ad. - 2: Poslanička pitanja i odgovori

Poslanička pitanja, prijedloge i inicijative podnijeli su poslanici kako slijedi:

Franjo Majdandžić:

1. Zahtjeva od Vijeća ministara da za iduću sjednicu podnese izvještaj o radu Vijeća ministara za 2001. godinu.
2. Zašto nije stavljen na dnevni red ove ili prošle sjednice Predstavničkog doma prijedlog Kluba poslanika Stranke za BiH, iznesen na 14. sjednici, o izmjenama i dopunama Poslovnika Predstavničkog doma, u skladu s članom 136. Poslovnika.
3. Traži da Kolegij podnese izvještaj o aktivnostima o vanjskoj politici koje Dom treba da usvoji i da odredi odgovarajuće pravce. Posebno zanimanje izrazio je za zaključak sa sastanka predstavnika Parlamentarne skupštine BiH sa predstavnicima Sabora Republike Hrvatske koji se odnosi na materijal kojim se reguliše imovinsko i radno pravo.
4. Zatražio da se Kolegiju Predstavničkog doma izda javna opomena – upozorenje za nepridržavanje termina početka rada sjednice Doma koji se u pravilu prolongira u vremenu od 30 do 60 minuta – 17. sjednica prolongirana je za četiri sata i 45 minuta, a 18. sjednica za tri sata.

Ibrahim Đedović:

1. Devetog oktobra u ime nekoliko poslanika, postavio je pitanje – Da li i ko u ime BiH razgovara ili pregovara na temu pristupa BiH Partnerstvu za mir i postoji li određena dinamika približavanja toj organizaciji i kakva je naša uloga u tome?
2. U Orjentacionom planu rada Predstavničkog doma za 2001. godinu predviđeno je, pored ostalog, donošenje 58 zakona čiji je predlagač Vijeće ministara, plus 18 zakona čiji su predlagači poslanici. Koliko je planiranog realizovano? Čijom krivicom nije više urađeno i da li će iko snositi odgovornost zbog neispunjavanja plana?
3. Obavijestio Dom da još nije dobio odgovor na pitanje koje je u mjesecu avgustu 2001. godine postavio, a odnosi se na putovanja – ko je putovao, po kojem kriteriju, koji su troškovi, koji rezultati? Traži odgovor.

Mustafa Cuplov:

1. Kojim firmama iz BiH su dodijeljene CEMT dozvole za 2001. godinu – traži osnovne podatke o tim firmama (naziv, sjedište, ukupan broj vozila, koja zadovoljavaju EKO propise, ukupna nosivost vozila i broj dodijeljenih CEMT dozvola)?

2. Kojim firmama iz BiH su dodijeljene CEMT dozvole za 2002. godinu – sa podacima iz pitanja broj 1.?

3. Kojim firmama iz BiH je dodijeljeno 10% jednokratnih međunarodnih dozvola za Austriju i Italiju, kojim je raspolagalo Ministarstvo civilnih poslova u 2001. godini? Potrebno je dostaviti osnovne podatke o tim firmama (naziv, sjedište, ukupan broj vozila, broj vozila koja zadovoljavaju EKO propise, ukupna nosivost vozila i broj dodijeljenih jednokratnih dozvola za Austriju i Italiju).

4. Šta Ministarstvo civilnih poslova poduzima da se obezbijedi veći broj međunarodnih transportnih dozvola za Italiju i Austriju koje su kritične već duži niz godina?

Osman Brka:

Ponovo postavio pitanje u vezi s događajima u Bosni i Hercegovini vezanim za hapšenje i deportaciju određenih državljana BiH i upoznao Dom o dopisima koje je tim povodom upućivao predsjedavajućem Vijeća ministara BiH uz koje mu je upućivao zahtjeve kojima je tražena pomoć od Komisije za ljudska prava, imigraciju izbjeglice i azil.

Bahrija Osmanović:

Kada će se konačno početi u ovoj državi poštovati Zakon o radnim odnosima, a naročito u dijelu obaveznog osiguranja radnika. Posebno upućuje apel na osiguranje uposlenih radnika kod međunarodnih organizacija (npr. SFOR i drugi)?

Miro Grabovac – Titan:

U vezi s zamolbama od strane branitelja optuženih Hrvata koji su zatočeni u Hagu za omogućavanja uvida u arhive Armije Bosne i Hercegovine i MUP-a BiH, postavio pitanje: Zbog čega Vlada Federacije BiH ignoriše zamolbe za uvid u traženu dokumentaciju i time diskriminiše obranu optuženih Hrvata u Hagu?

U vezi s stanjem da u zemlji ima različitih osiguravajućih kuća, postavio dva pitanja:

1. Koja osiguravajuća društva ispunjavaju uslove za obavljanje djelatnosti osiguranja imovine i osoba, te ko vrši nadzor nad njihovim radom?

2. Koji korisnici budžeta Federacije BiH ne osiguravaju imovinu i osobe na osnovu ponuda prikupljenih putem tendera kod osiguravajućih društava koja imaju odobrenje za rad u Federaciji BiH, te koliko se sredstava izdvaja za osiguranje korisnika budžeta i javnih preduzeća u većinskom vlasništvu Federacije Bosne i Hercegovine?

Boro Bjelobrk:

1. Izrazio nezadovoljstvo odgovorom koji je dobio na pitanje u vezi s posjetom delegacije Republike Srpske Moskvi.

2. Ponovo uputio kritiku Kolegiju u vezi s zahtjevom za dostavljanje informacije o događajima u Banjoj Luci i Trebinju u mjesecu maju 2001. godine.

3. Protestovao što se do sada ništa nije poduzelo povodom njegove inicijative u vezi s ustavnim promjenama. Zamolio da Kolegij uradi ono što mu Poslovnik nalaže.

Muhamed Begović:

1. Pokrenuo inicijativu da Kolegij Predstavničkog doma zajedno sa Kolegijem Doma naroda razmotri mogućnost formiranja zajedničkih komisija – kao što je Ustavno-pravna komisija, Komisija za ljudska prava (da budu zajedničke za oba doma), u cilju postizanja efikasnosti, racionalnosti i ekonomičnosti u radu domova, te da se razmotri da li je potrebna zakonodavno-pravna komisija.

2. Ponovo zatražio odgovore na ranije postavljena poslanička pitanja i pokrenuo inicijativu za rješavanje određenih pitanja.

Senad Šarganović:

1. Da li postoji strategija nabavke nafte i naftnih derivata u BiH na nivou BiH?

2. Da li će nakon uvođenja novih mjera hrvatske vlade vezano za transport, doći do poskupljenja nafte i naftnih derivata u BiH?

3. Kada će krenuti puna rekonstrukcija unske pruge Split-Zagreb?

Sead Butorović:

1. Obavijestio Dom da nije dobio odgovor na pitanje postavljeno Vijeću ministara u vezi sa objedinjavanjem zdravstvenih kapaciteta u Mostaru, odnosno na području Hercegovačko-neretvanskog kantona.

2. Aktuelizirao zahtjev Komisije za vanjske poslove koji je dostavljen Kolegiju Doma, a odnosi se na poslovničku nadležnost Komisije da ona određuje sastave ad-hoc delegacija Parlamenta u međuparlamentarnoj i drugoj saradnji u oblasti spoljnih poslova, a koju već duže vremena preuzima Kolegij Doma.

Sead Avdić:

Predložio da se u dnevni red naredne sjednice Doma uvrsti kao posebna tematska tačka: poslanička pitanja, stanje i kvalitet odgovora na poslanička pitanja. Predložio da se do tada obavežu svi izvršni organi da dostave odgovore na sva postavljena poslanička pitanja.

Abdurahman Malkić:

Obavijestio Dom da nije dobio odgovor na prošla pitanja.

1. Predložio da se na Domu razmatra kao posebna tačka dnevnog reda: Analiza učinka donatorskih konferencija u 2001. godini (gdje su bile, zašto neke nisu održane...), sa posebnom informacijom o donatorskoj konferenciji zemalja Islamske konferencije za povratak izbjeglica za BiH.

2. Kakvi su efekti Regionalne konferencije Pakta stabilnosti od 25. i 26. oktobra 2001. godine i je li održana, ako nije, zašto? (pitanje za Vijeće ministara i Ministarstvo evropskih integracija).

3. Koji su uslovi za priključenje – prijem u Program Partnerstva za mir; jesmo li ih dobili i ko ih ima? Traži da se poslanicima dostave.

Za Vladu Federacije BiH postavio dva pitanja:

1. U koji projekat u Srebrenici je utrošen jedan milion KM, u budžetskoj stavci "Pomoć za Srebrenicu" u periodu od 01.01. do 31.09.2001. godine?

2. Šta Vlada Federacije BiH, odnosno premijer kani preduzeti sa matičnim knjigama rođenih i matičnim knjigama umrlih koje su rađene u Uredu Općine Srebrenica u Tuzli i Vogošći? Građani traže izvode ili će tražiti, a ne mogu ih dobiti. Na ovu problematiku zamolio bih premijera za razgovor kako bi se prevazišao problem.

Adem Borić:

1. Kada će Vijeće ministara BiH Predstavničkom domu podnijeti izvještaj o radu za 2001. godinu?
2. Kako zaustaviti odlazak mladih i starih ljudi van Bosne i Hercegovine? Dosadašnji rad očito nije dao rezultate. Šta dalje?
3. Zašto se UNA- banka Bihać ne privatizira?

Zoran Spasojević:

Poslije šest godina od Dejtonskog mirovnog sporazuma, podnosim inicijativu da se u 2002. godini izvrši popis stanovništva Bosne i Hercegovine i entiteta. Razlog: Popis trebalo izvršiti 2001. Zašto se odugovlači?

Ad. – 3: Izvještaj Zajedničke komisije o postizanju Sporazuma o jedinstvenom tekstu Zakona o industrijskom vlasništvu u Bosni i Hercegovini

Predsjedavajući je podsjetio da su poslanici dobili Izvještaj zajedničke komisije. Potom je obrazloženje Izvještaja dao Sead Avdić, član Zajedničke komisije.

Predstavnički dom je jednoglasno usvojio Izvještaj zajedničke komisije o postizanju Sporazuma o jedinstvenom tekstu Zakona o industrijskom vlasništvu u Bosni i Hercegovini.

Ad. – 4: Izvještaj Komisije za ljudska prava, imigraciju, izbjeglice i azil o usaglašavanju Izvještaja o posjetama jednom broju opština i prijedloga zaključaka u Izvještaju

Predsjedavajući Komisije Osman Brka obrazložio je Izvještaj Komisije za ljudska prava, imigraciju, izbjeglice i azil sa 11. sjednice održane 15. januara.

U diskusiji povodom Izvještaja Komisije i prijedloga zaključaka sadržanih u Izvještaju Komisije o posjetama jednom broju opština u Bosni i Hercegovini, koji su na 11. sjednici Komisije usvojeni većinom glasova, učestvovali su: Dušan Stokić, Mustafa Cuplov, Bahrija Osmanović, Željko Bilbija, Osman Brka, Mirko Banjac, Miloš Jovanović, Muhamed Begović, Abdurahman Malkić, Branislav Lolić, Mirko Grabovac – Titan, Violeta Kamberović, Sead Buturović, Franjo Majdandžić i Ibrahim Đedović.

Poslije diskusije, u kojoj su ponovo izraženi oprečni stavovi o pojedinim tačkama predloženih zaključaka, predsjedavajući Mirjanić je konstatovao da su u diskusiji iznesena dva prijedloga o kojim bi Dom trebalo da se izjasni:

- prijedlog poslanika Dušana Stokića – da se glasa pojedinačno o svakoj tački zaključaka i
- prijedlog Mirka Banjca – da se izvrše izmjene i dopune pojedinih zaključaka.

Prvo je predsjedavajući dao na glasanje prijedlog Dušana Stokića.

Od 39 prisutnih poslanika ZA prijedlog je glasalo 11, protiv 21, uzdržalo se 7 poslanika. Prema tome, prijedlog nije usvojen.

Potom se Dom izjasnio pojedinačno o prijedlozima Mirka Banjca za dopunu određenih tačaka predloženih zaključaka.

Prijedlozi za dopunu 3., 4. i 5. tačke nisu usvojeni.

ZA prijedlog za dopunu 3. tačke glasalo je 11, protiv 20, uzdržana 4 poslanika;

ZA dopunu tačke 4. glasalo 11, protiv 24, uzdržana 4;

ZA dopunu 5. tačke glasalo 11, protiv 23, uzdržana 4.

Predstavnički dom je, sa 23 glasa ZA, 8 protiv i 7 uzdržanih, usvojio prijedlog Mirka Banjca za tačku 8. zaključaka, tako da on glasi:

“8. Preporučuje se ministarstvima entiteta koja imaju nadležnost u resoru za pitanja boraca, invalida i civilnih žrtava rata, da uspostave saradnju u koordiniranju prava ovih kategorija stanovništva u Federaciji Bosne i Hercegovine i Republici Srpskoj.”

Pošto je izvršeno glasanje o prijedlozima predsjedavajući je dao na glasanje Izvještaj o usaglašavanju prijedloga zaključaka u Izvještaju Komisije o posjetama jednom broju opština u Bosni i Hercegovini.

Od 39 prisutnih poslanika ZA je glasalo 28, protiv 11. Glasajući po entitetima iz Federacije BiH ZA je glasalo 25, iz Republike Srpske 3 poslanika.

Predsjedavajući je konstatovao da prijedlog zaključaka ide na usaglašavanje Komisije Kolegija.

Ad. - 5: Prijedlog zakona o Pravobranilaštvu Bosne i Hercegovine (drugo čitanje)

Predsjedavajući je podsjetio da su poslanici dobili Izvještaj Ustavno-pravne komisije o Prijedlogu zakona.

O Prijedlogu zakona nije bilo diskusije, pa je predsjedavajući isti dao na glasanje.

Od 39 prisutnih ZA je glasalo 29, a 10 poslanika su bili uzdržani.

Glasajući po entitetima, iz Republike Srpske ZA su glasala tri, a iz Federacije BiH 25 poslanika.

Predsjedavajući Mirjanić je konstatovao da Prijedlog zakona o Pravobranilaštvu u drugom čitanju nije dobio entitetsku većinu i da slijedi postupak usaglašavanja na Komisiji Kolegija Doma.

Ad. - 6: Prijedlog zakona o slobodnim zonama u Bosni i Hercegovini (drugo čitanje)

Željko Bilbija u kraćoj diskusiji skrenuo je pažnju Domu da je Dom naroda usvojio zakon s određenim amandmanima, pa je zatražio objašnjenje u vezi s tim.

Nakon razjašnjenja koje je dao zamjenik ministra Nikola Kragulj, Predstavnički dom je jednoglasno usvojio Zakon o slobodnim zonama u Bosni i Hercegovini u drugom čitanju.

Ad. - 7: Prijedlog zakona o državnoj službi u institucijama Bosne i Hercegovine (prvo čitanje)

U diskusiji su učestvovali Abdurahman Malkić i Ibrahim Đedović.

Poslije diskusije Dom je jednoglasno usvojio Izvještaj Ustavno-pravne komisije o Prijedlogu zakona o državnoj službi u institucijama BiH. Predsjedavajući Mirjanić je konstatovao da je Prijedlog zakona usvojen u prvom čitanju.

Ad. - 8: Prijedlog zakona o autorskom pravu i srodnim pravima u Bosni i Hercegovini (prvo čitanje)

O Prijedlogu zakona nije bilo diskusije.

Dom je jednoglasno usvojio Izvještaj nadležne komisije. Predsjedavajući je konstatovao da je Prijedlog zakona o autorskom pravu i srodnim pravima u BiH usvojen u prvom čitanju.

Ad. - 9: Prijedlog zakona o zaštiti potrošača u Bosni i Hercegovini (prvo čitanje)

Mirko Banjac je predložio, s obzirom da je prvo čitanje, da predlagač poboljša tekst zakona u principima, kao i da se organi koji su predviđeni za zaštitu potrošača na nivou države, uspostave i na nivou entiteta, uz jasnu subordinaciju.

Kako više nije bilo diskusije, predsjedavajući Mirjanić dao je na glasanje Izvještaj komisije za ljudska prava, imigraciju, izbjeglice i azil o razmatranju Prijedloga zakona. Izvještaj Komisije usvojen je jednoglasno, a time i Prijedlog zakona o zaštiti potrošača u prvom čitanju.

Ad. - 10: Prijedlog zakona o upravnim sporovima Bosne i Hercegovine (prvo čitanje)

Nakon što je predsjedavajući Doma podsjetio poslanike na Izvještaj nadležne komisije, u diskusiji su učestvovali Mustafa Cuplov i Mirko Mijatović.

Poslije diskusije Dom je, sa 37 glasova ZA, usvojio Izvještaj nadležne komisije o razmatranju Prijedloga zakona. Predsjedavajući je konstatovao da je Prijedlog zakona o upravnim sporovima usvojen u prvom čitanju.

Ad. - 11: Davanje saglasnosti za ratifikaciju

Osman Brka je u diskusiji vezano za sporazum i ugovor sa Republikom Slovenijom, prigovorio na vizni režim sa tom republikom i zatražio da država zaštiti privrednike Bosne i Hercegovine, te je rekao da će glasati protiv saglasnosti za ratifikaciju istih.

Glasajući ponaosob o svakom, Predstavnički dom je dao saglasnost za ratifikaciju:

- a) Sporazuma između Bosne i Hercegovine i Republike Austrije o unapređenju i zaštiti investicija – jednoglasno,
- b) Sporazuma između Bosne i Hercegovine i Vlade Republike Italije o podsticaju i zaštiti investicija – jednoglasno,
- c) Ugovora između Bosne i Hercegovine i Republike Hrvatske o saradnji i međusobnoj pomoći u carinskim pitanjima – jednoglasno,
- d) Sporazuma između Bosne i Hercegovine i Republike Slovenije o recipročnom unapređenju i zaštiti investicija – 34 ZA, 1 protiv,
- e) Rimskog statuta Međunarodnog krivičnog suda – jednoglasno,
- f) Konvencije Ujedinjenih naroda protiv transnacionalnog organizovanog kriminala – jednoglasno,
- g) Protokola protiv krijumčarenja migranata kopnenim, morskim i vazdušnim putem, kojim se dopunjuje Konvencija Ujedinjenih naroda protiv transnacionalnog organizovanog kriminala – jednoglasno,
- h) Protokola za sprečavanje, zaustavljanje i kažnjavanje trgovine ljudima, naročito ženama i djecom, kojim se dopunjuje Konvencija Ujedinjenih naroda, protiv transnacionalnog kriminala – jednoglasno,
- i) Sporazuma između Vijeća ministara Bosne i Hercegovine i Švajcarskog Federalnog Vijeća o međunarodnom drumskom prevozu putnika i roba – jednoglasno,
- j) Sporazuma između Vijeća ministara Bosne i Hercegovine i Vlade Republike Mađarske o ukidanju viza za nosioce diplomatskih i službenih isprava – 35 ZA, 1 protiv,

- k) Sporazuma između države Kuvajt i Bosne i Hercegovine o potpisivanju i recipročnoj zaštiti investicija – jednoglasno,
- l) Ugovora o slobodnoj trgovini između Bosne i Hercegovine i Republike Slovenije – 32 ZA, 4 protiv, 1 uzdržan.

Ovim je iscrpljen dnevni red 19. sjednice.

Sjednica je s radom završila u 16,00 sati.

Sastavni dio ovog zapisnika je transkript 19. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Željko Mirjanić